

金剛頂瑜伽念珠經於十方廣

唐三藏沙門大廣智不空奉 詔譯

爾時毗盧遮那世尊告金剛手言善哉善哉
爲諸修真言行菩薩者說諸儀軌則哀愍未
來諸有情等說念珠功德勝利由聞如是妙
意趣故速證悉地時金剛薩埵菩薩白佛言
唯然世尊我今爲說之爾時金剛薩埵菩薩
而說偈言

珠表菩薩之勝果 於中間滿爲斷漏
繩線貫串表觀音 母珠以表無量壽
慎莫驀過越法罪 皆由念珠積功德
碑礫念珠一倍福 木櫛念珠兩倍福
以鐵爲珠三倍福 熟銅作珠四倍福
水精真珠及諸寶 此等念珠百倍福
千倍功德帝釋子 金剛子珠俱胝福

蓮子念珠千俱胝 菩提子珠無數福
佛部念誦菩提子 金剛部法金剛子
寶部念誦以諸寶 蓮華部珠用蓮子
羯磨部中爲念珠 衆珠間雜應貫串
念珠分別有四種 上品最勝及中下
一千八十以爲上 一百八珠爲最勝
五十四珠以爲中 二十七珠爲下類
二手持珠當心上 靜慮離念心專注
本尊瑜伽心一境 皆得成就理事法
設安頂髻或掛身 或安頸上或安臂
所說言論成念誦 以此念誦淨三業
由安頂髻淨無間 由帶頸上淨四重
手持臂上除衆罪 能令行人速清淨
若修真言陀羅尼 念諸如來菩薩名
當獲無量勝功德 所求勝願皆成就

加持念珠貫串之法一如蘇悉地經說其瑜
伽經但說其功能理趣不說相應知

金剛頂瑜伽念珠經

卷二

二十六

音釋

頤奚結切 郝黑各切 箴音迷莫計切 垢直尼切 孽魚列切
也 搗初由切 也 顰毗賓切 串樞絹切 焉莫白切 越